

欽
定
全
唐
文

欽定全唐文卷八百三十九目錄

劉岳

除官當頒告身奏

請革虛銜任官疏

崔沂

請覆勘寇彥卿致死梁觀奏

安重誨

郭彥夔不許改名疏

朱守殷

上玉璽表

魏迺

申請慎勘囚徒奏

盧咸雍

請禁盜賊疏

錢傳

請禁止侵踐壇壝奏

李同

請逐旬斷囚奏

早刑罰疏

李殷夢

乞高宏超減死奏

趙明吉

請修天下宮觀奏

杜紹光

請置丞簿等官奏

李光緯

請錄功臣後裔奏

鄭統

請禁諸吏潛多奏

王鈿

請禁軍門招集無賴疏

楊途

請修整都城奏

郭正封

請曉諭諸軍放還所掠生口奏

劉昌魯

致馬殷書

崔協

請令國子監學生束脩光學等錢充公使奏

孫元

大唐銅山禪師信行和尚蘭若記

于嶠

請令河朔從常調疏

請蠲減租稅疏

李堯

奏乞恭陵園林地畝狀

蘇楷

駁昭宗諡號議

張廷範

昭宗諡號議

崔慄

請禁諸道進鞍轡御衣奏

請正街坊疏

欽定全唐文卷八百三十九

劉岳

岳字昭輔其先遼東襄平人遷洛陽少舉進士事梁厯官
侍御史貞明初爲翰林學士累遷戶部侍郎後唐莊宗入
汴貶均州司馬尋授太子詹事明宗卽位厯兵部吏部侍
郎忤馮道徙祕書監遷太常卿卒年五十六贈吏部尚書
除官當頒告身奏

凡在立朝悉是爲臣之責每蒙進秩咸加報上之忠奉勅
命以遷升固當感抃降綸言而褒飾或未捧觀將使知罷

欽定全唐文

卷八百三十九

劉岳

陟之繇認訓誥之旨必在各頒官告令觀制詞處班列以增光傳子孫而永耀伏請自今凡有除轉登朝官已上在京召至閣門宣賜在外則付本州使賜之

請革虛銜任官疏

伏以有國命官立朝釐務必資詳練以集事功竊見諸色詞科多昇通籍向者先爲列藩從事參佐可稱次經三館職名編修是著方居華秩始在彤逵近或雖有兩任前銜未厯一司公事莫申勞績虛謂滯淹未若委以親人俾之及物粗聞善最無議陟遷免自歎於漂流復有名於選任

伏乞特加搜探廣察單平白身者授以佐僚厯官處之縣令歲月俟當於制限班資擢在於朝行理契毓材事惟責實

崔沂

沂字德潤宰相魏公鉉幼子舉進士厯監察補闕昭宗時累遷諫議大夫入梁爲御史司憲擢禮部尚書貞明中充西京副畱守入後唐爲左丞判吏部尚書銓選司謫石州司馬明宗卽位復爲左丞以太子少保致仕卒年七十餘贈太子少傅

請覆勘寇彥卿致死梁觀奏

彥卿位是人臣無專殺之理況天津橋御路之要正對端門當車駕出入之途非街使振怒之所況梁觀不時迴避其過止於鞭笞粹首投軀深乖朝憲請論之以法

安重誨

重誨應州人其先本北部豪長後唐明宗鎮安國以爲中門使及卽位領樞密使遷左領軍衛大將軍兼領山南東道節度使改兵部尚書累加侍中兼中書令徙河中節度使坐與宦者交私明宗令太傅李從璋極殺之

郭彥夔不許改名疏

伏以凡是人名皆繇父命侍側者稱以榮左右爲後者稱以奉蒸嘗犯廟諱須更同御名亦改降此以外迴避無聞以春秋論之衛侯名惡大夫有齊惡太宗朝有虞世南君不聽臣易名皆所以重人父之命況郭彥夔長在青州霍彥威有時移鎮寧將私敬上瀆聖聰若便允從恐多援引只宜如故工部郎史于鄴奏名是盧文紀私諱儻許更名卽不至尤違其郭彥夔請在本道宜令權稱致雍在告勅內卽須仍舊誠爲至論永作通規

朱守殷

守殷少事後唐莊宗爲奴名會兒及卽位以爲長直軍使稍遷蕃漢馬步都虞候同光二年領振武節度使兼蕃漢馬步軍天成初拜同中書門下平章事授河南尹判六軍諸衛事加侍中移汴州節度使後謀叛明宗討之力屈自盡

上玉璽表

臣修雒陽月波隄至立德坊南岸得玉璽一面上進伏以皇上陛下明德動天聖靈御宇遂使千年之瑞出於九

地之間輝煥簡編光華帝道臣竊觀異瑞益表太平

魏迺

迺後唐天成元年官大理少卿

申請慎勘囚徒奏

此後伏請指揮天下州縣應所禁囚徒不許州縣廂縣大
小刑獄委觀察使刺史慎選清強判官一員於本廳每月
二十六日兩衙引問明置獄狀細述事端大則盡理推尋
小則立限決遣其外縣鎮禁人三日外具事節申本州府
仍勘問指揮

盧咸雍

咸雍後唐天成二年官起居郎

請禁盜賊疏

賊寇宵行逼脅村舍俾供食宿及當敗露指引行程追禁
經時慮妨農作望頒明勅俾得疎治

錢傅

傅後唐天成二年官太常丞

請禁止侵踐壇壝奏

當司專典祠祀伏以國城西面羣祀各有壇墠近年多被

民戶侵耕畜牧騰踐莫知處所行事之時旋封土芟草有乖誠敬今正芳春易行止絕者

李同

同後唐天成二年官左拾遺

請逐旬斷囚奏

天下繫囚請委長吏逐旬親自引問質其罪狀真虛然後論之以法庶無枉濫

平刑法疏

三尺之法天下共之法一動搖民無所措是知愛育黎庶

信及豚魚旣禮樂之中興在刑罰之必中陛下初當治亂
合肅化條請處分天下州使繫囚逐旬咨長史親自引慮
使知罪真虛然後論之以法則獄無冤滯政治和平

李殷夢

殷夢後唐天成二年官刑部員外郎

乞高宏超減死奏

伏以挾刃殺人按律處死投獄自首降罪垂文高宏超旣
遂復讎固不逃法戴天罔愧視死如歸歷代以來事多貸
命長慶二年有康買得父憲爲力人張泣乘醉拉憲氣息

將絕買得年十四以木鐺擊泣後三日致死勅旨康買得尚在童年能知子道雖殺人當死而爲父可哀若從沉命之科恐失度情之義宜減死處分又元和六年富平人梁悅殺父之讎投縣請罪勅旨復讎殺人固有典刑以其申冤請罪自詣宮門發於天性本無求生寧死不經特從減死方今明時有此孝子其高宏超若使須歸極法實慮未契鴻慈

趙明吉

明吉後唐天成二年官左補闕

請修天下宮觀奏

竊見天下宮觀久失崇修蓋自朱溫篡逆以來例多毀廢請下諸道應本朝舊置宮觀近經毀拆者皆勒增修以奉祖宗以宏孝治光陛下中興之業顯國家大道之源復我真宗寘茲永世其兩京宮觀有公田乞免科率俾充齋糧以給正名道士庶懇志於焚修期上元之福祐

杜紹光

紹光後唐天成二年官少府少監

請置丞簿等官奏

當司掌朝服儀仗祭器服兵戈以來散失向盡苟非得人
難爲掌轄臣准往例除監一員少監二員外比有丞主簿
五署令共一十六員近自僞梁廢省只委曹吏主張遂至
因循或多隱漏乞下中書於先廢官員內量置丞簿署令
分主當局公事

李光緯

光緯後唐天成二年官右拾遺

請錄功臣後裔奏

自本朝應運以來陛下登極之後有赤心事主戮力勤王

或代著軍功身已淪沒者乞追崇官爵延賞子孫庶張開國之榮永保承家之慶兼內外重臣已下班行間請許追封以光孝道雖九原之幽暗亦賀明時庶百辟之忠良同扶聖代

鄭統

統後唐天成三年官膳部郎中

請禁諸吏僭侈奏

諸司諸使職掌人吏乘暖坐帶銀魚席帽輕衣肥馬參雜庭臣尊卑無別汚染時風請下禁止

王鈞

鈞後唐天成三年官左拾遺

請禁軍門招集無賴疏

伏覩州縣百姓早因危歲小寇連綿舊染成非習性難改
逃刑網外作患民間起晝藏夜出之名懷念惡情農之志
惟觀得失但聽災危不慮嚴章當孤美化法緩則潛藏軍
旅法急則流散藩方條令難加網羅莫及是非同等曲直
相參伏乞顯示軍門無招此輩永去未萌之咎當平不力
之民

楊途

途後唐天成四年官左補闕

請修整都城奏

明公舉事須合前規竊見京城之內尚有南州北州縱市井不可改移城池卽宜廢毀復見都城舊牆多已摧塌不可使浩穰神京旁通綠野徘徊壁壘俯近皇居無復因循常宜修葺

郭正封

正封後唐天成四年官考功員外郎

請曉諭諸軍放還所掠生口奏

中興平定之初自數十年離亂編民或爲兵士所掠沒爲奴婢者旣無特勅釐革無復從良遂令骨肉流離有傷王化

劉昌魯

昌魯字安國相州鄴縣人唐末明經登第釋褐項城主簿累遷尚書郎乾符中出爲高州刺史遷防禦使爲劉襲所殺謹案九國志劉隱入廣州遣其弟襲攻高州昌魯大敗襲軍慮終爲所吞乃輦帑庫及士卒千餘人歸湖南馬殷殷奏授永順軍節度副使兼行軍司馬天成中卒與五代史所載不同

致馬殷書

僕昔占籍鄴中受恩唐室莅高三歲過黃巢之亂收合生齒堡于掠山因深爲塹憑高作壘攻苦食淡以勤士卒洎盜賊平定一境獨全高掠之民至今相戴而中原多故嶺南不賓劉隱亂常僭興師律舉蠻貊之衆成吞噬之心僕常訓勵甲兵躬當矢石掃壘一戰劉巖遁走雖仗義者必勝恃力者必亡然而山越之人瘡痍衆矣殘民以騁所不忍爲昔古公去豳竇融歸漢千古之下迭爲推美僕雖顓愚景慕前烈竊惟明公負江湖之固有桓文之業土宇至

廣仁風素厚願以所部歸款於執事謹刺血染翰上達誠
惻惟明公圖之

崔協

協字思化清河人舉進士爲度支巡官渭南尉直史館入
梁累官兵部吏部侍郎後唐同光初改御史中丞天成初
遷禮部尚書太常卿拜平章事四年卒贈尚書左僕射謚
恭靖

請令國子監學生束脩光學等錢充公使奏

當監舊例初補監生有束脩錢兩貫文及第後光學錢一

貫文切緣當監諸色舉人及第後近再多不于監司出給
光學文抄及不納光學文錢只守選限年滿便赴南曹參
選南曹近年選人並不收置監司光學文抄爲憑請自後
欲准例應諸色舉人及第後並卻於監司出給光學文抄
并納光學錢等各有所業次第以備當逐年修葺公使奉
勅宜准往例指揮兼自今後凡補監生須令情願住在監
中修學則得給牒收補仍據所業次第逐季考試申奏其
勘到見管監生一百七十八人仍勒准此指揮如收補年
深未聞藝業虛霑補牒不赴試期亦委監司簡點其姓名

年月一一分析申奏

孫元

元後唐明宗朝官登州刺史天成四年坐無名科率停任
大唐銅山禪師信行和尚蘭若記

山岳之形雄峻奇勢摩霄冲載萬象吻合雲雨怪狀異彩
萬有餘品而不可盡名今斯銅山峩峩石稜巉巉青壁巋
岌磳砢乍峭乍平左翼龍驤右盤虎踞是以西拓浮邱若
捫天心北截長江如浴滄海足可以壯楚之地勢也

關十
三字

洎大厯十一年冬仲月有大禪師曰信行京兆藍屋人俗

姓王氏早歲出家本雲居寺以戒香持身惠珠內瑩止於

此山駐錫雲木石坐逾旬無有知者會樵人入山採薪得

遇恭師駭然投刃設禮欣讚磬折關一貞元十三年春觀

察使兼御史中丞博陵崔公行府幕郎官判官李公臻巡

戶口兼封閉諸山蘭若例當關二文牒通告吏民勿令關一

字動至元和中縣令姚公崇信三寶深護法門聞多因公

侵漁斫伐林木又給公憑四年天下旱民皆絕粒道路殞

斃師乃出山有二居士頂敬禮拜共迎歸山於時四面聞

師都歸雲合大會草木生光二居士啟諸公曰和尚高僧

久此宏化教諭沉迷開甘露之門示生死之徑不旌敘山
門何以答乎禪德公依法言而共建斯法碣乃瑩真礎爰
命雕鐫縱劫還海竭太樸寢失斯之不墜

于嶠

嶠晉天福中爲虞部郎中知制誥遷中書舍人後唐同光
中爲翰林學士天成四年遷祕書少監以忤趙鳳奪官長
流武州百姓

請令河朔從常調疏

有國有家旣定君臨之位無偏無黨方明王者之心苟少

虧於同軌同文則微損於盡美盡善竊知河朔令錄須俟
本道薦揚朝廷就加其命況今萬國諸侯猶請行而貢職
豈使一方令長獨端坐以邀官未敦革故之風深缺維新
之化覩茲闕政敢貢直言乞宣付中書委於銓管此後並
從常調

請蠲減租稅疏

協和萬邦明主所以安社稷平章百姓哲后所以懷黎民
將延七百載之洪基須安億兆衆之黔首臣幸遇聖明之
代敢傾愚直之誠伏以朝廷先有指揮今年不更通括苗

欽宣從特旨頒作溥恩且屬夏秋已來霜雨頻降在山川
高土則必有豐年想藪澤下田非無水沴脫或已作潢汙
行潦猶徵青苗地頭不惟損邦國風化兼恐傷天地和氣
儻或皇帝陛下念茲在直哀彼災祥特於淹浸之田別示
優隆之澤重委鄉村父老通括不令州縣節級下鄉如或
檢驗不虛卽日蠲減租稅或有司以軍糧未濟兵食是虞
卽請卻於山川之田豐熟之地或於麻畦稗草蠶鹽地頭
據其本分價錢折納諸色斛斛所謂公私俱濟苦樂皆均
捨其短以從其長將有餘而補不足臣每因急務方敢上

言前後所奏十件有司未行一件伏乞陛下念臣苦思察臣盡心或可施行不令停滯

李薨

薨後唐同光初爲魏王繼岌推官掌書記明宗朝授河南少尹以秦王從榮謀叛事配石州

奏乞恭陵園林地畝狀

恭陵所其山園之內被民戶起舍屋居止臺觀皆被侵耕柏城松逕樵採殆盡乞下本縣與寺司重定完本園林地畝

蘇楷

楷乾寧二年舉進士重試黜落哀宗時依朱氏爲起居郎以舊憾上疏駁昭宗諡號梁祖卽位勒歸田里後唐同光中爲員外郎天成中累歷使幕會執政欲糾其駁諡之失以憂卒

駁昭宗諡號議

帝王御宇由理亂以審汙隆宗祀配天資諡號以定升降故臣下君上皆不得而私也伏以陛下順考古道昭彰至公旣當不諱之朝寧阻上言之路伏以昭宗皇帝睿哲居

尊恭儉垂化其於善美孰敢蔽虧然而否運莫興至理猶鬱遂致四方多事萬乘頻遷始則閹豎猖狂受幽辱於東內終則嬪嬙悖亂罹天閔於中闈其於易名宜循考行有司先定尊諡曰聖穆景文孝皇帝廟號昭宗敢言溢美似異直書按後漢和帝安帝順帝緣非功德遂改宗稱以允臣下之請今郊禋有日祫祭惟時將期允愜列聖之心更下詳議新廟之稱庶使叶先朝罪己之德表聖主無私之明

張廷範

廷範官太常卿

昭宗諡號議

昭宗初實彰於聖德後漸減於休明致季述幽辱於前茂
貞刼幸於後雖數拘厄運亦道失始終違陵寢於西京徙
兆民於東洛輟輦輅未踰於寒暑行大事俄起於宮闈謹
聞執事堅固之謂恭亂而不損之謂靈武而不遂之謂莊
在國逢難之謂閔因事有功之謂襄今請改諡曰恭靈莊
閔皇帝廟號襄宗

崔懷

懷後唐明宗朝官祕書少監遷右諫議大夫

請禁諸道進鞍轡御衣奏

凡在御前皆爲法物供奉所自出自內司豈假外臣而有營造若無禁止漸謂通規一則乖國朝淳厚之風一則冒典憲防閑之制

請正街坊疏

臣伏見雒都頃當制葺之初荒涼至甚纔通行徑徧是荆榛此際集人開耕便許爲主或農或圃逾三十年近歲居人漸多里巷頗隘須增屋室宜正街坊都邑之制度旣成

華夏之觀瞻益壯因循未改污濁增深竊惟舊制宮苑之側不許停穢惡之物今以菜園相接宗廟祠宇公府民家穢氣薰蒸甚非蠲潔請議條制俾令四方則之

欽定全唐文卷八百四十目錄

呂夢奇

後唐招討使李存進墓碑

韓儀

授朱朴平章事制

授王搏平章事制

授韓建昌黎郡王制

授王鎔常山郡王羅宏信長沙郡王劉仁恭彭城

郡王制

授成汭上谷郡王制

授葛從周兗州節度使制

授李思讓延州節度使制

授李成慶夏州節度使制

欽定全唐文卷八百四十

呂夢奇

夢奇後唐明宗授幽州節度判官遷右諫議大夫御史中丞

後唐招討使李存進墓碑

原夫古先哲王必有良輔時清則論至道以經邦和陰陽而均造化柱石王室使不顛不危世亂則運沉機而靖巖廊廓烟塵而掃蕪穢藩屏皇家俾可遠可大故有書汗簡勒金石皆紀其功德及於社稷生靈者也公諱存進字光

嗣本姓孫氏樂安人也武子之後歷世守職邊土因以家
焉曾祖巖振武節度都押衙銀青光祿大夫檢校右散騎
常侍兼御史大夫祖某金紫光祿大夫守勝州刺史檢校
刑部尚書兼御史大夫柱國父佺振武節度都押衙左校
練使銀青光祿大夫檢校左散騎常侍兼御史大夫上柱
國公業紹箕裘力便弓馬入蛟橋而振譽探虎穴以知名
氣直如絃心堅比鐵獻祖文皇龍潛朔野豹隱雲中常以
鏖虜爲心平戎是務以公早精劍術素熟兵機肘腋之間
爪牙爲任時或手持雙戟腰屬兩韃營開而紫塞風清戰

罷而金鎗日耀太祖武皇帝嗣承丕構致力中原屬以天步多艱王室如燬枕戈求敵奮劍遄征平大寇而復九重戮叛臣而清三輔以公生知武畧早立戰功委以轄鈐頗著勞績尋補節度押衙左廂衙隊威雄第一闕副兵馬使奏受銀青光祿大夫檢校太子賓客兼監察御史上柱國大順元年遷殿中侍御史景福二年五月太祖武皇帝以公性稟淳和言無矯飾勇能排難忠不病國錫以姓名同之骨肉榮連戚屬先生將門永依磐石之安終賴維城之固尋補充右廂義兒第一院軍使除授銀青光祿大夫檢

校國子祭酒兼御史大夫乾寧二年十月除授檢校左散
騎常侍光化二年二月授右廂行營馬步都虞候三年正
月兼授鴈門以北都知兵馬使永安軍使兼守禦都指揮
使五月權知汾州軍州事兼守禦都指揮使四年四月轉
充右廂衛隊都知兵馬使公以屢立戰勲繼承先澤勤王
在念報主爲心夙夜在公風雨如晦至天復元年四月除
授金紫光祿大夫檢校刑部尚書兼御史大夫上柱國二
年三月除授檢校兵部尚書十月加授檢校尚書左僕射
三年八月轉左廂衛隊都知兵馬使兼左廂行營馬步都

虞侯天祐三年三月奉命權知石州軍州事時以慈隰未歸西南爲患委之守郡志在安邊公乃和以養兵仁而撫俗輕其徭役勸以耕農惇嫠者由是遂生逋竄者以之復業遠來近悅老安少懷五穀有年一方無事百姓以爲召父復出杜母再生洎今昭文睿武光孝皇帝初承顧命之年以公舊臣元老委以腹心送往事居慎終如始尋以家讐未雪國患已深四方每切於經營中土尚稽於平定知公材堪出將相可封侯必當多難之秋能立盡忠之節五年正月制授檢校司空使持節石州諸軍事守石州刺史

七年十月轉充右廂步軍都指揮使八年十二月轉授權
行營蕃漢馬步都虞候尋以僞梁大舉兇鋒僭據深冀鎮
定告倒懸之急并汾興仗順之師主上以公久戰多謀雄
名制敵俾之扈從同救阽危十萬兇徒一陣席卷九年正
月奉命再知汾州軍州事四月制加光祿大夫檢校司徒
十二月授西南面行營招討都指揮使十一年三月收下
慈州秋毫不犯百姓復業三農以時尋制授慈州刺史民
歌其化如離石焉十二月奉命權知沁州軍州事五月正
授諸道行營蕃漢馬步使時以魏人久厭僞庭咸思真主

烽烟相屬星使交馳迎我鑾輿以救塗炭洎主上駐驛在
鄴以編部未肅都人乍安每懷親征常令預備將委權畧
罕得其人以公夙著廉勤素有威望九月補天雄軍都部
署巡檢使行營蕃漢馬步使仍舊公稟命益恭守法益謹
嚴以理下儉以約身犯者必誅惡者自息强豪貴勢聞之
凜然僞將劉鄩在莘縣日與主上對壘經年時公在都城
每設嚴備有日私謂人曰此賊固險不戰必有多謀俾於
南門多排弓弩以待之其夜果有劉鄩賊黨忽攻都城之
南門弓弩齊發死傷者甚衆遂令單騎潛報主上於東寨

於是王師盡出及旦兩軍相遇於中途五萬兇徒剿戮將盡惟劉鄩遁而獲免夫破大陣主上之神功也守都城公之長算也十四年正月轉左廂步軍都指揮使二月奉命權蕃漢馬步副總管聖上初收楊留鎮以爲將取中原先通古渡防邊固圉非公不辦尋留公在鎮守禦公以岸濶舟遲城孤兵少強敵在近奔衝是虞乃浚彼壕隍增其樓櫓功役未罷果有大寇攻城內備旣堅羣盜尋退十五年冬隨駕至胡柳陂大破汴寇迴十六年三月制授單于安北都護御史大夫充振武節度麟勝朔等州觀察處置營

田押蕃漢等使時駕在德勝寨上以大寇未平黃河是阻
貔貅往復舟楫爲勞一出義師數日方濟公乃埋大木於
兩岸貫輕舟於中河建作浮橋以過銳旅力排巨浪勢截
橫流扼彼咽喉壯我襟帶遂使六軍萬馬朝出暮還動若
疾雷履如平地十七年二月主上賞公之功就加特進檢
校太保仍賜御衣輦馬金銀器物綾羅錦綵等三月授天
雄軍馬步都指揮使行營蕃漢馬步使仍舊十九年正月
主上以契丹犯境鑾駕親征以公計出萬全謀深九拒留
公河外以禦奸兇果僞將段凝領兵攻打德勝寨公乃夜

警晨嚴出關內備三軍戮力萬人一心洎主上凱還寇孽
夜遁二月以公之功加特進檢校太傅隴西郡開國男食
邑三百戶當年鎮州有不令之臣張文禮弑其主而據其
位潛通梁苑密構契丹背我聖恩恣彼兇德主上以北門
猶梗中國未寧憤爲患於腹心志先平其巢穴王師繼發
廟算頻施殺戮雖多攻取未下以公聞風料敵嗅土知兵
尋付睿謀俾就攻討四月授北面行營都招討使公奉辭
伐罪固敵是求乃仗鉞而行鑿門而出戈矛雪瑩甲騎雲
飛發殷地之威聲勁踰漳水作連天之殺氣直壓潯川增

其嚴營對彼孤壘料於旬日必下危城無何伏雞搏狸乳
犬噬虎我師未列彼陣先成公乃獨領親軍迎鋒力戰王
師已捷惟公乘勝深入爲流矢所中身終於陣享年六十
八於戲功已垂成命不相待陳安旣往長留壯士之名卞
壺不迴永盡忠臣之節扶傾柱折濟險舟沉天子聞之輟
朝百姓聞之罷市夫生受國恩歿於王事大丈夫之終也
同光二年冬十月贈太尉以十一月八日葬於太原縣關
夏鄉鄭村東原禮也夫人彭城劉氏聞詩立德約禮成規
夫人渤海金氏素稟全儀生知懿範柔順同符乎坤德賢

和共出於家風有子七人長曰漢韶河東節度押衙都牢
城使兼右廂五院指揮使金紫光祿大夫檢校兵部尚書
兼御史大夫上柱國久讀兵書頗精師律謙恭接下廉謹
立身戰勝而口不言功任重而心益爲懼仁孝旣聞於鄉
里忠勤復表於旂常蘊茲全才以固都邑次曰漢威河東
節度押衙安國軍馬步軍副指揮使兼都牢城使銀青光
祿大夫檢校工部尚書兼御史大夫上柱國玉堂演術金
櫃傳符亟揚破敵之功深得將兵之妙次曰漢殷前振武
節度押衙沿河五鎮都知兵馬使銀青光祿大夫檢校左

散騎常侍兼御史大夫素蘊直誠早抱雄節飾身以文武之道交人以忠信之心次曰漢郇河東節度隨使兵馬使銀青光祿大夫檢校左散騎常侍兼御史大夫孝敬因心忠直成性交游不雜言行相符次曰漢筠前振武節度單于安北都護府司馬器度縱橫識畧孤遠耽書味道處約持謙樂勝廊廟先人後己次曰祿兒語多穎悟似有神通適當懷橘之年自立成人之智次曰歡兒神彩疎通骨氣清秀對日之年未逮摩天之勢已高可謂荀氏八龍賈生三虎併生於德門者也夢奇舊忝故總管令公幕下十五

餘年常在征行與公同處營寨辱公之知眷見公之行事
諸子弟不以虛薄請染柔毫敢竭荒蕪實敘銘勒庶比夫
燕然立碣峴首豐碑復旌上將之勲再墮行人之淚銘曰
五嶽降靈四瀆騰精雄才英傑爲時而生舟以濟險柱以
扶傾手撥禍亂力致昇平其一婉畫頻施嘉謀屢協德懋九
歌寵深三接續派天潢連芳玉葉出則奉辭入必獻德其二
量深謀遠才高器孤張皇義勇倜儻雄圖臂上繫弱腰間
輓轡聲馳絕塞勢懾羣胡其三經以斯文緯以我武柔亦不
茹剛亦不吐名高若廬力大如虎鐵石一心魚水三主其四

離石作牧西南之戍威以風行惠以雲布直者必舉枉者

必措俗戴二天人歌五袴

其五

化行四郡恩被百姓吏守公

平獄無冤橫冰壺之瑩水鏡之淨善人爲邦室家相慶

其六

得魏爲大守之爲難經巡務重制斷事繁威而不猛嚴而

不殘奸邪氣懾蒙右心寒

其七

楊留初下渡口是防百樓備

險九拒謀長城高如金壕浚如湯摧敵制寇拓土開疆

其八

天子恩深將軍戰苦仗節擁麾分茅列土作鎮單于以扼

窮虜畫錦而行不獨前古

其九

九曲連天隔彼寇黨白浪漭

騰洪流滉漾造舟爲梁誰謂河廣謀而後行利有攸往

其十

趙有不庭干國之紀作孽一方構禍千里烟塵未滅嬰敵
之矢力戰酬恩歿而後已其十一桓桓上將弼我元后馮坐
大樹周居細柳忠不負名勇不期壽天長地久勲庸不朽
其十二

韓儀

儀字羽光萬元人倓之兄唐末以翰林學士爲御史中丞
梁祖卽位貶棣州司馬

授朱朴平章事制

門下夢傳巖而得真相殷道中興獵渭濱而載獻臣周朝

致理是知顯諸仁而藏諸用君子但守其沉機懷其實而
迷其邦大器曷虛其顯位朕自逢多難渴佇英賢暗禱鬼
神明祈日月果得哲輔契於勤求朝散大夫守國子毛詩
博士上柱國賜紫金魚袋朱朴學業優深識用精敏久徊
翔而不振彌貞吉以自多朕知其才遂召與語理亂立分
於言下聞所未聞兵農皆在於彀中得所未得不覺前席
爲之改容須委化權用昌衰運是乃振於庠序陟彼鈞衡
自我拔奇寧拘品秩於戲時風甚薄國步方艱兵戈未息
於近郊經制日隳於故事官闕焚蕩邑里凋虛外則未殄

金史卷之四十一
元克內則未凝庶績整我綱紀成我雍熙百度羣倫俟爾
康濟勉思敬戒以服寵光可朝議大夫同中書門下平章
事

授王搏平章事制

門下朕聞軒轅得力牧而爲五帝先夏禹任臯陶而爲三
王祖雖不言而化自契於元功而端拱仰成實資於哲輔
況有嘗持大柄久竭訐謨振寅亮於巖廊立惠迪之軌躅
俾乃舊貫再委平衡斷自朕懷用符僉屬扶危匡國致理
功臣新授武勝軍節度浙江東道管内觀察處置兼宣撫

等使金紫光祿大夫檢校尚書右僕射同中書門下平章

事使持節越州諸軍事越州刺史上柱國

闕三

字開國公食

邑二千戶王搏道潔秋霜文含春彩勳不踰矩立必正方
行中孚絕類之貞保大有匪彭之節訥於言而敏於行深
恥名浮竭其力而致其身唯將道勝頃歲朕察其才智可
委鈞衡拔自貳卿升之四輔果能推誠憂國罄慮匡時啟
沃心之嘉猷進苦口之良藥洎汧岐叛渙京國戒嚴罔懼
觸鱗屢陳逆耳且搏以明君待我故每敢極言我以忠臣
任搏亦常加獎納深知盡瘁永用寘懷自鑒輅省方艱危

扈蹕澄心無撓臨事應機爲時而生信非虛言昨以初清
鏡水新蕩稽山慎擇周才以康疲俗是用輟於台鼎俾踐
師壇念卿前後奏陳有犯無隱吾雖不敏深諒至忠靜復
卿言皆合朕志謹正之事久而彌芳雖浙右之瘡痍誠思
惠養顧岐陽之祇逆尤藉機籌且歸班瑞之符卻秉代天
之筆爾其內凝庶績外殄元克勉精醫國之謀報我知臣
之德天官重位光祿崇階兼以命之用旌寵數服茲休命
可不慎歟可光祿大夫守吏部尚書同中書門下平章事
功臣勲封並如故

授韓建昌黎郡王制

門下記曰諸侯有功德於人者加地進律書云德懋懋官
功懋懋賞其有功宣於宗社德被於生靈立扶危定顛之
勲展安祖建儲之力忠誠貫天地貞節伏鬼神須行不次
之恩用報非常之績俾諧僉議爰舉寵章具官某維嶽降
神自天生德巨材山立雅量海深行健不以武而以文明
處順不以邪而以忠正其動也直其靜也專孫武理兵令
惟畫一文翁訓俗教必在三臨大事則侃侃丈夫在平居
則謙謙君子生知無對默識絕倫自鎮關防已周星律化

驍雄之士盡說詩書流愷悌之風大行鄉里去秋迎鑾郊
次駐蹕州城語時事之艱危言淚俱下奉行朝之供億勤
竭無渝而又請謁元龜載營複廟纔當旬浹更事嚴裡椒
壁虹梁備聞壯麗禮容備物靡不精周旣而首貢封章議
建儲貳復六十年之墜典振三百載之洪規邦本以貞丕
基永固實自良畫成此懿圖去不令之人以清朝列懲左
道之輩用肅羣倫謀無不臧動有成憲肇我中興之業因
其活國之誠永念殊庸實無與二是乃錫功臣之號封異
姓之尊用答元勲勉膺異渥噫嘻當屯室之時雖危無咎

者鮮乘泰亨之際在上不驕者難全卿始終罔怠操執贊輔以德永孚於休

授王鎔常山郡王羅宏信長沙郡王劉仁恭彭城

郡王制

門下五嶽承天共振橫霄之力四溟紀地咸施潤下之功所以國之獻臣時之哲輔亦如華崧衡霍登九命而冠三公海瀆江河輯六瑞而踰五等居牧伯之位秉桓信之圭苟非茂績昭宣殊勲薦洽豈可膺茲並命用叶僉諧我有三臣實全七德爰舉疇庸之典式符進善之經具官王鎔

夙紹弓箕丕承堂構襲重侯之積慶允武允文奉先王之
成規克勤克儉剛簡而無傲虐栗直而務溫寬言必有章
動不踰矩具官羅宏信將星瑞彩卿月祥光常竭力於公
門每推心於王室保大有九三之盛任重而不危守中孚
六四之貞致遠而不泥旣爲良帥復號吏師具官劉仁恭
氣薄雲天義形霜雪祕元符於腹笥機術無儔運黃畧於
意筌弛張有度以恬養智用壯處謙三軍敬之若神明百
姓仰之如膏雨居然侯度屹若國楨而皆道邁殷賢名齊
漢傑洞達總戎之要翦起扶輪精通育物之源龔黃拜手

犬牙而理人心以寧屏蔽一隅繚長城於瀚海藩垣中夏

布橫

一作貳

落於天田疇咨協恭奮庸熙載或奠茲冀土成

阜安於大名或宅彼幽都共綏懷於有北駢闐勲緒照灼
簡書敷進律之殊恩獎殿邦之美化真相正三台之位掌
武居一品之尊增實封以錫圭田升虛邑而光寶節酬功
報德惟恐不多勉竭乃誠各膺休命

授成汭上谷郡王制

門下朕聞賞有功則勞者勸考其績則政事彰能否旣分
黜陟斯在其有勲已銘於簡冊化復被於謳謠表率公侯

澄清土宇靜夢澤於千里盡闢汙萊曜軫宿於九霄先生
芒角行爵繼祿顯忠遂良式副僉諧爰登寵寄具官成汭
氣合冬日志烈秋霜蘊雄特之標中能抑畏抱介潔之操
外富通明自節制衡巫統臨荆楚承匪人之貪虐屬生聚
之流離比衛文之革車兼無三百同魏相之版戶畧不盈
千曾未踰時俄成樂國井閭富庶人物殷繁璣組之賦聿
修苞茅之貢常入畧丹廡闕箇簾咸臻睦隣而四境風行
蕩寇而三峽浪息況蔓聯湖嶺輻輳梯航旣水陸之靡難
致賦輸之罔滯積茲功緒實謂忠勞苟無舉善之文是廢

疇庸之典今則移紫微之尊秩疏異姓之殊封位冠三台
爵踰五等用獎分憂之績乃申進律之恩勉力在公傾心
報國服我休命無忘恪恭

授葛從周兗州節度使制

門下建牧立監施亭育之深仁顯忠遂良表激揚之茂典
其有聲馳軍伍績著郡符威令夙振於戎行美化霧流於
封部允契求材之念宜當分閭之榮遂舉寵章俾膺重寄
具官某學洞元符智苞黃石抱刻銘燕然之志蘊刊石勃
弄之心氣薄雲天義凌霜雪以和爲貴用壯處謙御下而

寬猛有經料敵而鎚銖罔失朕以鄒魯重鎮兵革連年慎
擇可人用蘇疲俗得於僉論叶我數求昔魏延以勇畧逸
羣自偏裨而登上將呂蒙以才智拔萃捨行陣而總戎麾
況乎早踐方州屢登崇秩績効已彰於靡盬獎酬宜示於
優恩仍加水土之尊式寵旌旄之寄爾其靜訓驍勇之士
惠鮮惇獨之人布我憂勤康其凋瘵膺茲超擢無忘恪恭
授李思讓延州節度使制

門下夫息亂以靜濟道者權當底定干戈之時乃更易節
旄之任寧辭改作式貴叶宜不移將相之榮別奉藩宣之

寄用光勲傑爰舉寵章具官某氣薄雲天志堅金石蘊翦
起之雄勇負寇賈之智謀誠明可以伏鬼神義烈可以貫
風雨累代以勲勞報國徇節忘生一門以忠孝承家推心
濟物功銘鐘鼎誓著山河每逢多難之秋必奮安危之用
昨以邠岐動衆畿甸匪寧授以統臨錫之鈇鉞舉旄効命
投袂連行備聞靡盬之誠克抱盡敵之意朕念兵革繁興
十有八載蒸黎板蕩邑里洞虛爲人父母之心深慙涼德
拯國艱危之運唯有責躬爰議罷兵用安率土又念昨者
邠人不令潛持兩端有誤軍機遂成退守復臨彼土自不

懷安雖欲撫寧諒難輯睦是乃換雙旌之雄重割兩郡之膏腴成一家千里之封列三鎮十連之責勉思勤竭膺我寵靈

授李成慶夏州節度使制

門下夫有大功德於天下者必垂慶私門賞延於公室者必傳家令子賞延者國俾嗣者侯著之格言是爲彛則祇應丕訓虔奉成規徵比事經式登功緒必盈僉論方舉寵章某官繼美勲門生知戎畧識度早聞其善將風稜尋號於老成朔漠之氣嚴天資毅勇崆峒之人武神授端莊以

忠孝爲身經守謙直爲家法諸父每舉宿將知歸徐晃沉
詳幼而特立旣克紹於門風爰委用於舊土未行真命且
假劇權士心咸感於惠和封部果臻於寧肅旣符試可須
議與能方當殄寇之時將用正名之典我之異渥實爲許
謨以爾成慶代有殊烈祿山滔天之日文已載於司勲朱
泚盜國之時續復書於盟府洎黃巢犯闕先臣進士兄弟
宗族攜率征討首謀大計果成元功麟閣丹青鴻鐘紀勒
垂之不朽永以無窮今則近輔元渠久未誅翦朕之鬱憤
格於皇天爾其思曾高戡禍之勲續父叔定傾之烈盡驅

銳旅速殄祆巢克副家聲以康國步服我休命所宜若何
勉樹功名勿孤注倚

欽定全唐文卷八百四十一目錄

新文豐出版社藏書

田頴

移吳太祖書

裴廷裕

授孫儲邠州節度使制

授孫偓判戶部制

東觀奏記序

大唐故內樞密使特進左領軍衛上將軍知內侍

省事上柱國濮陽郡開國侯食邑一千戶食實

封一百戶吳公墓誌銘 并序

朱珍

加忠懿王天下兵馬都元帥勅

于兢

瑯琊忠懿王德政碑

大周相州安陽靈泉寺故寺主大德智 闕一師像

塏銘 并序

大唐故處士張君墓誌銘

鄭準

爲荆南節度使成汭乞歸本姓表

姚洎

請令公卿子弟准赴貢舉奏

李珣

對祭侯判

欽定全唐文卷八百四十一

田頴

頴字德臣廬州合肥人唐天佑初爲宣州節度使與梁太祖謀討楊行密事洩爲行密所殺

移吳太祖書

侯王守方以奉天子譬百川不朝於海雖狂奔猛注澶漫遐廣終爲涸土不若順流無窮也況東南之鎮揚爲大塵賤刀布阜積金玉願公上恒賦頴將悉儲峙具單車從行

裴廷裕

廷裕字膺餘昭宗時官翰林學士守尚書司封郎中知制誥遷左散騎常侍梁初貶湖南卒

授孫儲邠州節度使制

門下惟彼邠邠連城咸鎬雜華夏羌渾之俗有公劉后稷之風地控三州境延千里撫茲疲俗允屬名臣某官磊落喬松晶明片玉以雍睦作理家之本用詩書爲干祿之基信厚難窺端莊不倚動皆顧行王遠每恥於妄言志切導人季路罕聞於宿諾明鏡利劍高謝塵埃止水秋山居爲圭表自拔於侯府選在明庭心惟業官舉不避事廣明中

盜侵關輔兵滿京師恭惟先皇帝遠幸右蜀爾則佐彼上
相首誅助桀之人贊我元勲大挫吠堯之黨爾後一麾出
牧雙節升壇安人得賢太守之風訓兵盡真將軍之令龔
黃並駕管樂齊肩疊是功庸宜臻顯貴睠乃巨屏素號名
藩爰自前朝必求名帥郭子儀以山河之誓戡定多難白
敏中用廊廟之尊經營薄伐近則薦其喪亂方苦流亡將
欲戢彼干戈保其生聚朕意念人惟爾所宜靜以撫封儉
而植己弔彼凋殘之後宏其惠愛之誠副我殷憂佇爾蘇
息大司空貴秩左光祿崇階亦遣進封皆勸爲理苟孤委

任其如法何

授孫偓判戶部制

門下在天成象拱帝座者三台在地稱崇鎮方隅者五岳
我有賢輔立乎大朝叶三台照耀之功契五岳匡扶之力
旣凝庶績宜峻徽章正議大夫守中書侍郎同中書門下
平章事上柱國賜紫金魚袋孫偓壁立孤峯渭清一派早
以閨門之行聞於鄉里之間張融高文聚爲玉海孫綽麗
賦擲作金聲頗喧驚座之詞華遂整沖天之羽翰鵬張上
國顏淵首冠於諸科弓招小山穆生道優於置醴厥後簪

御史筆講博士書從容累踐於南宮諫諍俄升於左闥蘭
香見忌玉冷多猜比騷人湘浦之行繼賈誼長沙之役朕
自知直道召歸掖垣每於敷陳必盡肺腑因朱雲折檻之
對識張華王佐之才斷自中宸爰立作相彌縫不倦匡益
居先操心願革於澆浮進善必先於行賞搜抉沈滯拔用
隱淪致我時風自爾而厚張說當元宗之代初啓集賢竇
參居德宗之朝別分戶部一則寵九流之墳典一則萃四
海之賦輿式仗英規遂兼茲領高建楚子之爵貴升鄭眾
之階勉殄寇讎以復朝社可銀青光祿大夫依前中書侍

郎同中書門下平章事充集賢殿大學士兼判戶部事仍封安樂縣開國子食邑五百戶餘如故

東觀奏記序

聖文睿德光武宏孝皇帝自壽邸卽位二年監修國史丞相晉國公杜讓能以宣宗懿宗三朝實錄未修歲月漸遠慮聖績湮墜乃奏上選中朝鴻儒碩學之士十五人分修三聖實錄以吏部侍郎柳玘右補闕裴廷裕左拾遺孫泰駕部員外郎李允太常博士鄭光庭專修宣宗實錄廷裕奉詔之日惕不敢息思撫實無隱以成一朝之書踰歲修

例竟未立國朝故事以左右史修起居注逐季送史館史館別設修撰官起居注外又置日厯至修實錄之日取信於日厯起居注參而成之伏自宣宗皇帝宮車宴駕垂四十載中原大亂日厯與起居注不存一字致儒學之士閣筆未就非曠職官無憑起凡例也廷裕自爲兒時已多記憶謹采宣宗朝耳目聞覩撰成三卷非編年之史未敢聞於縣官且奏記於監國史晉國公藏之於閣以備討論

大唐故內樞密使特進左領軍衛上將軍知內侍省事上柱國濮陽郡開國侯食邑一千戶食實

封一百戶吳公墓誌銘

并序

昔周文王以聖德受命太伯以至仁讓王錫封於吳因國
爲氏公諱承泌字希白卽裔孫也曾祖士侃贈金紫光祿
大夫內給事祖德鄘贈特進右領軍上將軍宣宗之朝渥
恩特異出則綰兵符而臨巨鎮入則司劇務以闡皇猷懿
宗皇帝將奉丕圖公時爲弓箭庫使送往事居之際顯著
忠規綴衣壓紐之時皆參密議父全紹贈朝散大夫內侍
省內侍公則長子也

闕四字

王夷甫本天仙中人雅度清標

嵇叔夜真風塵外物趨庭之歲穎悟過人五始窮經元凱

闕一 成於傳癖三冬足用慰祖乃號於書淫百氏九流無

不該博而又昇高作賦納賈馬之降旗遇景裁詩破曹劉

之堅壘韜光未仕藉甚高名學書王右軍妙傳其法受琴

甘處士闕一字 奪其師韓開府精擇賓僚首行羔雁庾元規

之招殷浩謝鎮西之辟袁宏千載論交一時歸美尋以闕二

字 昇之班行乾符末先皇帝以郇瑕之封筦權遺利命公

以本官充解縣闕一字 監催勘副使明如夏日洞察秋毫每

辭种嵩之金常遠劉輿之膩潔白無玷課最有聞搜考勾

闕一 字 盡闕一字 黠吏青蚨赤仄充於水衡以功賜緋魚袋充

字 次定全唐文

卷一百一 裴廷裕

解縣催勘使尋屬關河失守盜賊驚奔銅駝既卧之九衢
金根去狩於三蜀公則以權利錢寄河中府單車往河北
傳檄諸道言天子蒙塵之辱責官司奔問之儀召彼革車
期復上國遂與易定節度使王處存同領甲兵二萬屯東
渭橋公奔赴行朝面奏本末先帝感其忠果錫以金章依
前充解縣權稅使會蒲帥王榮盡占鹽租請贍軍伍公復
歸朝闕後改充南詔禮儀副使中輟不行中和三年充許
蔡通和慰諭使下齊之辯素優方期集事吠堯之犬正眾
不克前征朝廷罪之奪我金紫先帝幸寶雞之歲搜訪才

能召公充西院承旨卻復章綬尋以疑蛇未辨鬪蟻方喧
遂辭清切之班去樂林園之趣馬相如彈琴之地揚執戟
草元之亭自有高情寧拘美爵帝重違其請便充西川宣
諭使不到闕者數載聖上虔承大寶振起頽綱歷訪舊臣
以裨至理尋加內侍伯判內侍省内給事綜領省務領袖
廷臣張華則該博舊章黃瓊則練達故事加內侍充學士
使嚴徐論思之地枚馬視草之司公以精識通才光膺是
選絲綸夜出得以講陳鴛鴦會同靡不宴洽改宣徽北院
司守右監門衛將軍漢陽郡開國伯食邑七百戶公酷好

闕一門誓不茹羶飲酒宥密之地非所願也懇讓者再三

上許不奪素志方拜恩焉景福二年改內樞密使加特進

左領軍衛上將軍知內侍省事濮陽開國侯食邑一千戶

食實封一百戶公素懷遠畧常切致君大用之辰納忠不

一其他柅制萬務條緝百司

闕一字

在簡書不可備載乾寧

二年春正月二十日薨於渥水年四十五

闕

稟君命也冬

十月一日上御札示中書門下許公昭雪十一月二十日

葬於京兆府萬年縣涇川鄉北姚村禮也長男修

闕一字

次

男修睦皆南遷未復小男修禮葬有日公之季知象猶子

恕己以書寓門僧請銘於裴廷裕時爲天子詞詔之臣不得辭乃序而銘曰

泗磬豐鐘其聲不羣鸞翎鳳翼其

闕三字

公之苦學公之好

文果於盛日匡我明君一言

闕二字

百歲

闕二字

聖道

闕二字

宏

恩曲宣以是忠骨藏之下泉祐我國家億萬斯年

朱珍

珍徐州豐縣雍鳳里人梁祖起兵以中涓從尋署宣武右職光啓元年署諸軍都指揮使累立戰功後與李唐賓不協手斬之梁祖怒其專殺遂誅之

加忠懿王天下兵馬都元帥勅

勅曰古之王者啓邦經野分職設官疇建殊庸懋昭大德或頒之弓矢或錫之土田我有重臣世膺王爵雖任一方之帥未超極品之榮漢法非劉不王唐制元帥爲重實惟大任寧授匪人用錫名藩永扶昌運咨爾匡聖廣運同德保定功臣上柱國吳越國王錢俶乾坤間氣海嶽孕靈爲民物之綱維實朝廷之藩翰承家保國奕世美堂構之賢治亂持危四方推英豪之主梯航時登乎丹陛兵革靡及乎蒼生才足以爲主而庇民德足以移風而易俗肆歸建

極不替忱誠有齊桓尊周之心而忠義或逾乎齊有晉悼
駕鄭之畧而功名不忝於晉建之都督則百辟允諧使之
元戎則三軍從命表海受一方之寄真王啓萬戶之封匪
爾令名曷兼眾職爾其不隲喜始永圖令終承我徽言毋
忝厥位可特授天下兵馬都元帥增食邑二千戶實封五
百戶賜推誠保德安邦致治忠正功臣餘如故

于兢

兢梁開平二年以吏部侍郎加中書侍郎平章事

瑯琊忠懿王德政碑

粵自範金合土之制雲師火紀之名禹別九州竟咨四岳
莫不簡求良輔宏濟兆人彰克勤克儉之能垂可久可大
之業嗣太叔寬猛之政循仲尼富庶之言旣茂勲勞宜標
篆刻公名審知姓王氏瑯琊人也其胙土命氏疏源演派
代濟其美史不絕書後以太祖就祿光州因家於是郡焉
曾祖友贈光祿卿王父蘊玉贈祕書少監父恁贈光州刺
史繼贈太尉公卽太尉之季子也初公兄潮志尚謙恭譽
謁鄉曲善於和眾士多歸之福建節度使陳巖旣嚮其名
又以所屬泉州求牧乃遣禮而請之及到任頗著家聲後

巖在軍病甚不能視事軍士等懼無統馭皆願有所依從
泉牧遂以郡委於仲弟審邽而與公偕赴至則積惡者屏
去爲善者獲安因詔授節度使累加檢校右僕射於是刻
其訛弊整其章條三軍無譁萬姓有奉乾寧三年僕射遘
疾且付公以戎旅仍具表奏尋加刑部尚書威武軍畱後
俄授金紫光祿大夫右僕射本軍節度使公器局端雅識
理融明稟崧嶠之真精得圮橋之妙畧及膺帝命寵陟齊
壇細柳連營旌旗動色蒲盧莅政草樹逢春一年而足食
足兵再歲而知禮知義方隅之內仰止攸同曩以運屬艱

虞人罹昏墊農夫釋耒工女下機公旣統藩垣勵精爲理
強者抑而弱者扶老者安而少者懷使之以時齊之以禮
故得污萊盡闢雞犬相聞時和年豐家給人足版圖旣倍
井賦孔殷處以由庚取之盡徹夫述職之道底貢爲先九
邱爰序於厥包五霸是徵於縮酒雖旬服之近江漢之中
或遇阻艱亦絕輸賦惟公益堅尊獎慎守規程松栢後凋
風雲如晦地征旁午天庫充盈共仰勤劬咸知匡戴嘗以
學校之設是爲教化之原乃令誘掖童蒙興行敬讓幼已
佩於師訓長皆置於國庠俊造相望廉秀特盛閩川以南

地雖設險人尚爭雄或因饑饉薦臻或以刻剝爲苦荏苒
易聚集穴難探公感之以恩綏之以德且曰吏實爲虐爾
復何辜示以寬仁俾之柔服遂使數十年之氛祲遽致廓
清一千里之封疆旋觀昭泰張綱以單車入壘虞詡用絳
縷擒姦以古況今彼猶懷愧爰自天寶艱難之後經費日
繁聚斂之臣名額茲廣卽山鳩利任土庀材峻設防隄頗
開賙贍洎經烽燧仍患崎嶇三司之職務空存四海之輪
蹄鮮至公按其程課命以權衡盡叶舊規猶彰宏業而又
奉大雄之教崇上善之因象法重興導師如在虹梁雕栱

重新忉利之宮鈿軸牙籤更演毗尼之象而又盛興寶塏
爭捨淨財日麗飛臺霞攢彩檻顏豔疑迴向遠邇歸依用
俾羣緣皆同妙果佛齊諸國雖同照臨靡襲冠裳舟車罕
通琛賁罔至亦踰滄海來集鴻臚此乃公示以中孚致其
內附宛土龍媒寧獨稱於往史條支雀卵諒可繼以前聞
自燎熾西秦煙飛東觀魯壁之遺編莫採周陵之墜簡寧
存亟命訪尋精於繕寫遠貢劉歆之閣不假陳農之求次
第籤題森羅卷軸夫四隣共守蓋當偃革之期七德方修
必假禦衝之備是以恢張制度固護基局程功而莫匪子

來作事而適當農隙立崇墉之百雉表巨屏於一方巖邑
湯池曾何足數折筋縈帶固不可憑未若暫勞致茲永逸
兵戈洊起帑庾多虛凡列土疆悉重征稅商旅以之而壅
滯工賈以之而殫貧公則盡去煩苛縱其交易關譏鄙市
匪絕往來衡麓舟鮫皆除守禦故得填郊溢郭擊轂摩肩
竟敦廉讓之風驟睹樂康之俗閩越之境江海通津帆檣
蕩漾以隨波篙楫崩騰而激水途經巨浸山號黃崎怪石
驚濤覆舟害物公乃具馨香黍稷薦祀神祇有感必通其
應如響祭罷一夕雷震暴雨若有冥助達旦則移其堅險

別注平流雖畫鷁爭馳而長鯨弭浪遠近聞而異之優詔
獎飾乃以公之德化所及賜名其水爲甘棠港神曰顯靈
侯與夫召神人以鞭石驅力士以鑿山不同年而語矣於
戲辨真金於大冶認勁草於疾風不有良臣誰康澤國尋
就加平章事檢校右僕射如故腰懸相印手握兵符益壯
軍聲彌新殊渥又改光祿大夫檢校司空轉特進檢校司
徒然而物議輿詞功厚賞薄以爲爵祿未稱疇庸於是異
姓分封仍加井邑轉檢校太保瑯琊王食邑四千戶食實
封一百戶公之仲兄審邽自守泉郡一紀於茲黠馬皆調

疲人盡泰公性惟雍睦氣稟中和韻契墳簞政侔魯衛可
謂高明輝映超絕一時者也公以天下兵馬元帥太尉中
書令梁王勲格穹昊德服華夷奉大國之歡盟爲列藩之
表率令節度都押衙程賁及軍州將吏耆老等久懷化育
願紀功庸列狀上聞請議刊勒元帥梁王以公如河誓著
匪石情堅累貢表章顯陳保證朝廷冀宏誘勸特示褒揚
將建龜趺合徵鴻藻兢謬居清列曾乏雄文頃歲嘗詠皇
華往宣宸旨已於視聽親飫徽猷今之執簡濡毫得以研
精覃思備陳懿績實無愧詞乃作銘曰

日月麗天舟楫濟川內外克乂股肱惟賢淮水長清嶽嶺
方寧慶隨祚遠材爲時生伯氏雄特泉人仰德求瘼斯勤
頒條有則冠車被疾付以師律政教翕張士庶寧謐懿彼
閩越帥實英傑地列周封心馳魏闕聖澤汪洋元戎啓行
有典有則爲龍爲光高懸秦鏡理道自靜比屋懷仁連營
稟令航海梯山貢奉循環務其輸季毋憚險艱周征之術
公田什一約以有程守而勿失輕徭薄賦謳歌載路高掩
龔黃遐追召杜鄉校皆遊童蒙來求雅道靡靡儒風優優
惟虺吹毒久依山谷罔恣陸梁竟忻柔服法宮梵宇勝因

所主崇構斯精福慶攸聚佛齊諸國綏之以德架浪自東
驟山拱北墜簡遺編繕寫精研麟臺矗爾虎觀森然畚鍤
其勤雉堞連雲永制爾敵用壯我軍關譏不稅水陸無滯
遐邇懷來商旅相繼黃崎之勞神改驚濤役靈祇力保千
萬艘劉驥荀龍塤笮雍雍維邦維翰以侯以公元帥梁王
虎步龍驤挺彼七德削平四方公能事大推心斯在風雨
無渝歲寒不改殊勲茂績盡瘁宣力國之丹青邦之柱石
位冠台鼎任隆兵柄重以徽章寵分異姓優詔銘功萬古
英風貞珉是勒垂之無窮

大周相州安陽靈泉寺故寺主大德智闕一師像

塋銘并序

法師諱朗字闕一智俗姓王氏其先周靈王子闕四鄴城

生也闕一祖惟禰芬馥旃禪師生闕一神闕三塵濁年七

歲投大慈寺主大德起法師闕三誦維經闕三至年十二

屬大唐太宗闕一武聖皇帝廣闢度門闕四蒙闕四弱冠闕三

字闕一支依本寺曇源律師習毗闕一業闕一之後又闕一

慈潤寺主大德智神論師學闕二雲闕一復進學闕一摩

金剛般若并中觀等三經二論闕二源流闕二激揚或研

精默識加以純之

闕一字

一分

闕一字

溫於

闕一字

易覓元文方

同三絕老莊素問博泛羣

闕一字

持金剛般若及尊勝咒等

各二萬遍文梵音轉

闕一字

首出緇

闕一字

春秋六十有八夏

踰卅

闕二字

訖於

闕一字

安二年六月五日蛻遷識蓋

闕一字

大

闕一字

云逝孰不悲傷門徒大雲寺僧元果靈泉寺僧元晤

元暉等攀慕慈誨思報莫由遂於州西南六十餘里本寺

闕一字

懸壁山之陽起塏供養粵以三年十月廿五日

闕二字

永畢塏內便造以彌勒像一鋪圖形奉侍

闕二字

事

闕三字

以

跡宣敬託彫刊乃爲銘曰

子晉之後命氏爲王風流遠派爰宅真章父功祖德令聞

令望降生才子玉質金相而樹來白而花繡黃稻

闕一字

夙

被檀

闕一字

早芳經泉折玉戒海浮香迦旃妙教羅革鳴莊

嚴壇

闕一字

頂捨筏金剛舌講舌誦無怠無荒積誠

闕三字

心

自彊中宗懸解外法通方歌唄特妙唱導尤長以

闕三字

南

北宏揚胚胎有裕利樂無

闕一字

鞅

闕一字

早

闕一字

輪脫輻消

殿推

闕一字

粵有子尚

闕一字

師剛披山建

闕一字

剖石開堂敬

闕一字

來聖勒廟舌傍身命有

闕一字

供侍無忘安厝旣畢銘

頌攸彰裨同遵於大道庶共

闕三字

常

大唐故處士張君墓誌銘

君諱興字文起南陽西鄂人也漢太史衡之胄昔靈表西
豐畱侯建帷幄之策星移東井常山興締構之功或師範
萬乘照彰圖籍光臨千里煥炳縑緇異動三台識司空之
忠烈吟謠兩穗表太守之仁明奕葉簪裾蟬聯珪組規矩
重疊代有人焉緬究遺編可畧而言矣曾祖瓘魏冀州信
都縣令絃歌不奏美化洽於一同鳴琴詎張仁風清於百
里祖虔周太僕寺主簿才能幹濟智畧強明尋見辟除轉
授瀛州河間縣令父才隋揚州江都縣丞輔弼風規俗流

清化贊導名教邑致歌謠君系高華等琨珥之良劍箕裘
纂組若青邱之祥鸞義烈因心未資於典籍忠良天縱不
假於規模崇有道之林宗慕無移之

闕二字

道契虛元性符

高尚縱寂寥而賞趣特澹泊而怡神志道研精非由鼎食
窮微盡要詎徇輕肥得性琴書吟嘯煙霞之表時談物義
進退木鴈之間妙款榮期高符黃綺時遊三徑乍撫一絃
以道義而爲尊輕蟬冕而非貴探蹟幽隱迴邁莊惠之機
致遠鉤深遙鉗黃老之趣想秦晉之有近見潘楊之代親
遂婚於辰州辰溪縣令漢陽趙徽之女幽閒婉孌中饋聿

修懿淑溫和母儀庭宇君纂業成勞遇揚雄之痼疾淫書
作療遭皇甫之沉疴氣擁膏肓疾纏腠理屬華佗而不瘳
見扁鵲而無瘳以貞觀廿二年七月廿二日碎於私第春
秋六十有二夫人趙氏碎於永徽四年春秋六十粵以龍
朔元年歲次辛酉十月癸亥朔廿三日乙酉合葬於故鄴
城西禮也面平原背漳浦左帶蕪城右連林麓刊茲元石
紀以清徽勒彼鴻名光斯泉戶庶使青山爲礪表盛德而
彌芳碧海成田闡家聲而不泯嗚呼哀哉乃爲銘曰

規矩重疊珪璋代映三台表異兩歧興詠人倫楷模搢紳

龜鏡百代逾芳千齡彌競道合幽元性符林壑迹齒滄波
名流臺閣貴不充拙賤不隕穫思巧雕龍光逾刻鶴有謂
升堂相期入室帷薄猶空繁華未實儵忽不幸咄嗟已失
一棺猶閉萬事長畢茗蕘壟首巉巖山足露銷草翠風飛
樹綠元門一掩寒燈無旭私壤式題貞芳載燭

鄭準

準字不欺乾寧中舉進士荆南節度使成汭辟爲推官後
爲汭所殺

爲荆南節度使成汭乞歸本姓表

臣門非冠蓋家本軍戎親朋之內盱眙爲人報怨昆弟之間點染無處求生背故國以狐疑望隣封而鼠竄名非霸越乘舟難效於陶朱志切投秦出境遂稱於張祿又云成爲本姓郭乃冒稱本避犯禁之辜敢歸司寇別族受封之典誠愧諸侯伏乞聖慈許歸本姓

姚洎

洎梁開平元年以翰林學士擢兵部尚書知貢舉二年以兵部侍郎兼鹵簿使

請令公卿子弟准赴貢舉奏

近代設詞科選胄子蓋所以網維名教崇樹邦本者也曩時進士不下千人嶺徼海隅偃風嚮化近歲觀光之士人數不多加以在位臣僚罕有子弟就其寡少復避嫌疑實恐因循漸爲廢墜今在朝公卿親屬將相子孫有文行可取者請許所在州府薦送以廣毓才之義

李珣

珣字公度隴西燉煌人僖宗朝舉進士累拜左補闕梁祖卽位爲左諫議大夫兼宣徽副使友珪之亂除右散騎常侍充侍講學士內討之日爲亂兵所傷卒

對祭侯判

得甲祭侯辭曰強飲食御史糾非息宴之禮不
伏

澤宮舊典相圃遺法實備多儀亦彰異數至若一日之澤
息物休農四牡旣朝勞勤式宴於是取像貍步設廣庭之
禮物載張獸侯量下網於地武射之義也豈直主皮神則
憑焉必俟工祝羞醢醢之嘉薦陳儆戒之順辭或中鵠而
升則實爵以獻終乃示其慈惠庶將強其飲食正依經理
寧畏簡書爰詢柏署之言未達梓人之職甲之不伏可謂

守官